

李文忠公奏稿

李文忠公奏稿

卷之八目錄

挑濟吳淞江摺

同治四年正月二十一日

派兵由海道援閩摺

同治四年正月二十九日

籌畫軍餉片

同治四年正月二十九日

洋弁請獎片

同治四年正月二十九日

程學啟建專祠片

同治四年二月十七日

蘇滬軍需第一案清單摺

同治四年二月十七日

用款與洋人交涉權宜酌定片

同治四年二月十七日

軍需用款酌量變通片

同治四年二月十七日

飭催郭松林楊鼎勳航海援閩摺

同治四年三月初四日

援閩未便分兵援粵片

同治四年三月初四日

李元度請免發遣摺

同治四年三月初四日

添練馬隊片

同治四年三月二十二日

各軍分援淮徐摺

同治四年四月初四日

許關暫緩徵稅摺

同治四年四月十四日

酌度軍情無庸出省督勦摺

同治四年四月十四日

餉票收捐停止片

同治四年四月十四日

請將奉天糧穀准內地商船販運摺

同治四年四月十四日

援閩獲勝會克漳州府摺

同治四年五月初六日

密陳勦捻事宜片

同治四年五月初六日

郭松林勦辦同安土匪片

同治四年五月初六日

署理總督籌辦大概情形摺

同治四年五月初六日

海關應撥北新贛州太平三關絲稅請免補解片

同治四年五月初六日

日  
派兵航海赴津摺

同治四年五月初九日

酌籌南路布置情形片

同治四年五月初九日

援閩克復漳浦縣摺

同治四年五月十六日

籌調洋鎗礮隊赴津兼籌製造片

同治四年五月十六日

拏獲白齊文片

同治四年五月十六日

太倉鎮洋二屬改徵折色摺

同治四年五月十六日

蘇省地漕錢糧一體酌減摺

同治四年五月十六日

裁革錢漕積弊片

同治四年五月十六日

添調赴津之洋鎗隊無從撤回摺

同治四年閏五月初三日

李文忠公奏稿卷八

全集一之八

桐城吳汝綸編錄

挑濬吳淞江摺

同治四年正月二十一日

奏爲蘇省挑濬吳淞江河道在事出力員董懇  
恩獎敘恭摺奏祈

聖鑒事竊照吳淞江居太湖下游爲蘇省三江之一西受蘇郡諸  
水東會黃浦江以達於海蘇松太三府州屬田疇灌溉宣洩所資  
商民舟楫往來所必經也同治元二年間臣駐軍上海查該處河  
道年久未濬海潮壅塞日以淤淺旱則蓄水無多潦則泛濫不定  
於農田水利關係尤重當經臣飭令甯臬司劉郁膏督同候補知  
府汪有勛督上海縣知縣王宗濂暨委員紳董等籌款挑濬計自  
上海曹家渡野雞墩至黃渡爲吳淞江正河又申紀港江橋南翔

各支河並壩外裏浦口撈濬稀淤五逆灣取直開挖新河總共工  
長九千二百餘丈逐段挑竣核給夫工錢十四萬五千餘串臣親  
往驗收工程均尙核實河身一律深通查開濬之時正值連月淫  
雨集夫鳩工艱苦百倍該員董等一面催捐籌費一面分款督率  
得以剋期成事其裨益於農田商旅者甚多所有出力各員董自  
應擇尤給獎據蘇藩司劉卣膏臬司郭柏蔭查明具詳請  
奏前來臣覆核無異除總辦委員降調候補知府汪有勛業經月

案

奏請開復原官及出力稍次員董由外酌獎外謹將尤爲出力各  
員董注明勞績酌擬升階開繕清單恭呈

御覽合無仰懇

天恩俯准給予獎敘以昭激勸理合恭摺具

奏伏乞

皇太后

皇上聖慈訓示再此項經費出自本地捐款請免造冊報銷合併

陳明謹

奏

派兵由海道援閩摺

同治四年正月二十九日

奏爲遵

旨酌派兵將擬由海道赴閩援剿恭摺覆陳仰祈

聖鑒事竊臣欽奉同治三年十二月二十一日

寄諭著於蘇省防兵內酌量抽撥礮隊赴閩歸左宗棠調遣等因  
欽此又十二月二十六日

寄諭由蘇赴閩水道可通著李鴻章與左宗棠妥爲籌商飭劉銘  
傳統帶所部星速赴閩等因欽此又同治四年正月二十日

寄諭李鴻章卽籌畫軍裝口糧令劉銘傳等分隊入閩並催令起  
緊部署起程無任觀望等因欽此臣正在籌商調派復准左宗棠  
咨催前來查劉銘傳周盛波等二十四營人數較多據報正月初  
進紮皖豫交界之三河尖離蘇已千餘里若再調回由蘇赴閩遠



道既易疲乏師期必致遲誤且豫省捻逆飄忽無常暫留該軍駐  
淮河上游堵扼回竄於局勢似亦相宜容會商督臣曾國藩隨時  
察度辦理惟聞賊日肆披猖疊奉

諭旨酌量抽撥又准左宗棠咨而商催臣何敢推諉謹就蘇省防  
兵內就近調撥查有奉

旨飭令赴任之福建陸路提督郭松林統帶松字楚勇七營遇缺  
題奏提督楊鼎勳統帶勦字淮勇六營均係洋鎗隊訓練精整歷  
年轉戰蘇常嘉湖等處所向有功應飭赴閩協剿並令記名總兵  
曹仁美帶護衛營併歸郭松林統領記名提督黃中元帶親兵二  
營併歸楊鼎勳統領以厚兵力至閩省與蘇並非連界由溧陽南  
去則隔皖南江西兩省由吳江東去則隔浙江一省內地水道實  
不能通況由皖浙入閩崇山峻嶺迤邐千里客軍遠去呼應不靈

饋運不繼將若之何臣再四籌思只有由滬航海至廈門登岸較  
爲便速現在侍逆大股久踞漳州句結洋人窺伺泉廈廈門爲通  
商要口距漳甚近由此相機進剿亦較得勢臣檄令郭松林楊鼎  
勳等由建平東壩拔隊來蘇整頓軍裝籌給口糧一面飛飭江海  
關道丁日昌商雇火輪夾板等船豫備分起裝載前往其船價卽  
於關稅內提給作正開銷惟洋船雇值過昂該關收稅日絀久已  
不敷支解一旦增此鉅款籌措維艱俟能籌出若干銀兩雇定若  
干船隻裝得若干兵勇卽催令迅速起程續再奏報所有酌派兵  
將擬由海道赴閩援剿緣由恭摺由驛馳陳伏乞

皇太后

皇上聖鑒訓示謹

奏

籌畫軍餉片

同治四年正月二十九日

再欽奉

寄諭閩省餉源早竭飭臣處派兵籌畫軍裝口糧並於到閩後源接濟左宗棠來函亦謂客軍入境米鹽薪草均無從購辦須請代籌月餉閩中蹂躪瘠苦固係實情惟蘇省亦殘破之區僅上海稍為完善從前江浙未復各路商賈聚集一隅籌捐尙易近來富商四散市貨彫零關稅捐釐驟形減色而臣部水陸七萬人月餉過鉅支絀時虞去年秋冬之交方裁撤數千人督臣曾國藩以臣軍鎗礮軍火尙為精利南北軍情未定不宜遽撤嗣又疊奉援豫援閩之

旨計撥往皖北劉銘傳等一萬數千人現派赴閩郭松林等八千人均須力籌接濟本省防兵除淮揚太湖兩支水師向食蘇餉外

陸軍尙有三萬餘人分守要地亦難聽其飢潰以入抵出不敷甚多加之本年奉撥京餉二十萬甘皖協餉時來催偪若以一省兼顧數省蘇力必不可支諒邀

聖明俯鑒惟本省軍餉匱乏實有不容緩置之情卽如此次援閩道路險遠郭松林楊鼎勳等求給兩月口糧十餘萬雇用洋船經費恐亦將近十萬此皆分外添出之款臣督同司道設法騰挪不知能否應手該軍到閩後卽照臣處糧臺放餉章程一律普放每月只得半關越境遠餉勞苦甚比照左宗棠所部二萬八千餘人由浙月撥十四萬已得全餉者亦恐甘苦之不均然臣未敢遽請分濟也惟有照蘇省各營餉章暫行勻撥查由滬附海船轉解廈門滬廈兩處均須設局擬令海關道丁日昌在滬籌解已革廣東候補道段詰於閩粵沿海情形均甚熟悉擬派該員隨隊照料

前往廈門會同興泉永道鄧廷枏妥籌接運第臣軍回例按照各營人數月給食米柴薪油燭等項俾臨敵不至缺乏戰守方能久支需費無多而關係最要蘇省去閩絕遠人地生疏勢難瑣屑代謀昨已緘覆左宗棠請其酌飭地方官或委員籌款就地采辦隨營轉運期無缺誤懇

恩飭下福建督撫迅速籌辦該軍到閩後既歸左宗棠調遣將來調令進剿賊勢軍情未能預定若去廈門過遠卽處無從轉解蘇省亦難兼管並請豫飭福建廣東各督撫就近協力籌濟勿得推諉所有籌畫軍需大概情形理合附片陳明伏乞

聖鑒訓示謹

奏

洋弁請獎片

同治四年正月二十九日

再江蘇常勝軍自同治二年戈登接帶以後督同分管兵頭教練  
勇丁會合官軍攻城奪隘所向有功現在蘇省肅清該軍陸續凱  
撤提督銜戈登業已薨沐

恩施其餘在事外國弁助出力似應一體給獎用示

聖朝賞功懷遠之意前據英國公使威妥瑪將幫同戈登打仗各  
洋弁開單交由總理衙門知照到臣當經飭據蘇松太道丁日昌  
通商隨員候補知府應寶時會同戈登及總稅務司赫德悉心查  
核大致相符並據英領事巴夏禮面稱緝譯官梅輝立等與有功  
績此外法國兵官陸國費在上海教練鎗勇亦著勤勞由該道等  
開摺詳請獎勵前來臣覆核無異謹繕清單恭呈  
御覽合無仰懇

天恩俯准分別獎賞如蒙

俞允卽由臣札飭蘇松太道仿照天津金寶星及銀牌式樣趕緊製造送交各領事分給佩帶以示寵榮除咨明總理各國事務衙門外附片具陳伏乞

聖鑒訓示謹  
奏

程學啟建專祠片

同治四年二月十七日

再記名提督江西南贛鎮總兵程學啟上年春開督攻嘉興傷亡

欽奉

恩旨褒卹加太子太保銜

賜諡忠烈並於蘇州等處建立專祠七月間復奉

特旨追贈三等輕車都尉世職旋據蘇郡紳士馮桂芬潘曾瑋等  
呈請將賊遺僞聽王府重加修葺爲該提督建祠並附祀陣亡各  
將士查蘇城收復後據善後局司道稟稱城內各衙署被燬須權  
借民房辦公惟查賊遺僞王府閒有經賊改造規模僭越非復民  
房之舊請酌給原主地價即將屋宇入官暫作公所當經批飭遵  
照在案又據統領兵勇劉銘傳張樹聲潘鼎新王永勝等稟稱追  
念程學啟功烈之大死事之苦願各捐助銀兩爲程學啟建祠經



費酌給民房地價交還原主並請行知地方立案春秋致祭列入  
祀典以垂久遠各等情前來臣查程學啟在蘇浙一帶戰績最偉  
克復蘇省尤爲首功茲官紳公議就蘇城內賊遺房屋籌給原主  
地價俾建專祠仰副

聖朝崇祀報功之至意除飭縣列入祀典外理合附片陳明伏乞  
聖鑒謹  
奏

蘇滬軍需第一案清單摺

同治四年二月十七日

奏爲蘇滬軍需第一案收支款目總數開列清單恭摺奏祈

聖鑒事竊准部咨同治三年七月初七日奉

上諭同治三年六月以前各處辦理軍務未經報銷之案在將收  
支款目總數分年分起開列簡明清單奏明存案免其造冊報銷  
等因欽此當經轉行欽遵旋據督辦報銷局蘇州藩司劉郁膏等  
具詳湘淮水陸各軍糧餉卹賞隨營文武官弁鹽折采辦雜支製  
造戰船等項應分別正雜款目請自同治元年四月起至二年六  
月底止爲第一案自二年七月起至三年六月底止爲第二案其  
補發元年三月底以前原部各軍正雜各款及所收皖省撥解之  
款毋庸割歸皖省統歸第一案另列收放又上海原設軍需製造  
各局並松滬原存舊部兵勇糧餉卹賞應截至元年十月初三以

兼署藩司蘇松太道吳煦交卸司篆前一日止歸該道府案開報  
十月初三日起至三年六月底止歸該司等由局彙入第一案開  
報以清界限等情當將酌議開報章程奏蒙

聖鑒在案茲據該司劉郁膏等詳稱第一案收款自同治元年正  
月督臣曾國藩在皖陸續撥給及臣抵滬後提撥江蘇藩關各庫  
並釐捐等項共計收銀四百四十三萬三千五百九十八兩一錢  
三分七釐二絲三忽錢五萬九千一百九十七千四百二十六文  
據各委員將支放實數詳報到局該司等督飭局員逐款勾稽悉  
心查核計第一案請銷銀四百四十二萬三千六百六十六兩六  
錢五分三釐一毫四絲二忽錢三萬四千二百七十一千文實存  
銀九千九百三十一兩四錢八分三釐八毫八絲一忽錢二萬四  
千九百二十六千四百二十六文歸第二案接續開報所有收支

銀錢均就實收實放之數開列其各軍欠餉統俟酌發餉票完竣核清數目另行專案辦理詳請具

奏前來伏查同治元年四月間臣由皖統師至滬接署撫篆其時鎮江以南僅存上海一隅之地賊勢披猖軍情萬分喫緊經臣於虹橋四江口幾經血戰力挫兇鋒大局始有轉機嗣後遂漸募勇添營規畫進取並挑留松滬原防兵勇人數愈眾需餉愈繁江海關稅供支常勝軍用款及外國會防教練勇丁口糧購置外洋鎗礮軍火需費尤多適值九漢開闢滬稅減色因將釐捐大加整頓藉濟水陸軍需而綜計收支仍人不敷出提前搭後設法騰挪各營口糧積欠甚鉅前因無從籌補援案奏請酌發餉票設局收捐其欠餉不願領票者仍難相強此外挪借洋行采辦米價應行按款提還又購辦外洋軍火價值較昂分立期票亦須陸續清付三

年以來脩飭司道百計經營勉力措拄雖幸稟承

廟算恢復省郡州縣二十餘城江蘇全境得以廓清而辦餉之難  
實較用兵爲更甚茲據開報各款覆加確核委係實用實銷毫無  
浮冒應請存案免其造報除常勝軍等五款另行開單附  
奏外合將蘇滬軍需第一案收支款目總數開列清單恭呈

御覽伏乞

皇太后

皇上聖鑒謹

奏

用款與洋人交涉權宜酌定片

同治四年二月十七日

再蘇滬軍需案內常勝軍用款爲向來軍務所無又英法兵官牧  
練洋鎗礮隊湘淮各營添雇洋人教習及租置輪船買用外洋軍  
火製造西洋礮火均經先後隨摺聲明具奏有案據督辦報銷局  
蘇州藩司劉邵膏等詳稱常勝軍及英法教練洋鎗礮隊勇糧同  
治元年十月初六日以前應歸前兼署蘇藩司蘇松太道吳煦一  
手開報以後川款常勝軍截至三年四月裁道止其教練勇糧並  
各營教習洋人辛工及租買各項輪船購買外洋軍火製造西洋  
礮火等五款截至三年六月底止其請銷銀二百七十八萬八千  
三百八十八兩八錢三分八釐一毫係於藩關各庫捕盜經費釐  
捐等項內陸續提撥另開收支款目詳請具

奏前來臣查前五項用款皆與洋人交涉無例可循經臣隨時體

宜酌定飭發並無浮冒理合附片具陳並照繕清單恭呈  
御覽一併存案免其造報再前項既屬例所不及嗣後支放各款  
仍應覈實專案奏報請銷其法國教練龐字營口糧由會防經費  
項下動支者應歸外銷由關道庫動支卽附入  
奏銷彙辦合併陳明伏乞

聖鑒謹

奏

軍需用款酌量變通片

同治四年二月十七日

再前奉

上諭同治三年六月以前各處軍務未經報銷之案免其造報其自本年七月起一應軍需凡有例可循者務當遵例支發其例所不及有應酌量變通者先行奏咨備案等因欽此仰見

朝廷實事求是至意曷勝欽服除三年六月以前軍需用款歸於月案奏報清單外查楚軍向以五百人爲一營每百人用長夫三十六名所統湘淮陸軍原照楚軍向章連長夫其六百八十名爲一營每月支餉銀二千八百餘兩係按勇百名內勇目十名每名日支銀二錢正勇九十名每名日支銀一錢五分長夫三十六名每名日支銀一錢綜計所支銀數與准銷勇糧每名月支銀四兩五錢成案有減無增惟勇營向不准銷夫價而長夫一項移營



拔隊挑運鍋帳可以不拉民夫不佔民房至臨敵交仗分送粥飯  
子藥與賊對壘日夜修濠築卡皆賴長夫爲之其得力實與勇丁  
無異應作爲正勇開報至陸軍內開添洋鎗礮隊一二哨勇丁亦  
須加增則一營有七八百名不等節經造具官弁銜名兵勇總數  
清冊咨送軍機處戶部有案又水師官弁向來只支鹽菜跟役不  
支例馬草乾獸折實屬不敷食用是以淮揚撫標太湖各起水師  
官弁均照陸軍一體支給例馬草乾獸折等項其水陸各營五六  
品軍功之哨官向照外委例支給鹽折均與厯屆造銷成案稍有  
未符自應遵

旨先行奏明立案以備嗣後據實開報除咨戶部外所有軍需用  
款酌量變通緣由謹附片陳明伏乞

聖鑒再楚軍章程兵勇陣亡受傷卹賞銀兩俱山營全數給領不

由原籍找給亦與例案未符先經分咨戶兵二部查照在案合併  
陳明謹  
奏

飭催郭松林楊鼎勳航海援閩

同治四年三月初四日

奏爲飭催郭松林楊鼎勳各營雇搭洋船航海援閩業經分起裝載啟行恭摺奏報仰祈

聖鑒事竊臣擬派兵將由海道赴閩援剿前已專疏覆陳欽奉二

月初六日

寄諭卽飭丁日昌趕雇輪船並將郭松林楊鼎勳等十六營軍裝口糧安速籌措催令起程適雨雪兼旬各營由建平東壩拔隊來蘇長途冒雨不無阻滯該軍人數較眾行糧及雇船一切費用約須二十萬兩臣督同司道竭力挪湊展轉需時至二月杪甫克就緒郭松林楊鼎勳先後督隊抵滬江海關道丁日昌諭飭在滬閩廣紳董楊徽猷郭振瑞李瑞岐等與洋商議雇火輪船專裝弁勇月雇夾板船載運軍火馬匹輜重福建陸路提督郭松林統所部

八營遂於二月十八日全數登舟記名提督楊鼎勳所部八營因輪船稀少不敷裝載由丁日昌趕緊添雇三月初間當可接續開駛自上海放洋至廈門約計數日可到在左宗棠面稱龍巖州克復後康逆汪海洋亦棄巢竄遁有歸併漳州之勢南面濱海一帶正虞空虛李世賢句結洋人廈門英領事柏威林往來詭祕各等情是閩省沿海南路極形喫重臣已飭令郭松林楊鼎勳等整肅軍規於到廈後察看賊情地勢妥籌合剿並密令丁日昌轉商上海英領事巴夏禮致書廈門領事約束洋人勿與侍逆交通官軍到後如遇有洋匪接濟被營中查獲照約懲辦或有幫助賊匪打仗臨陣格殺勿論據丁日昌函報英布各領事皆允爲通知無論是否可信仍飭郭松林楊鼎勳等相機聯絡俾得就我範圍不致添賊羽翼庶於大局有裨所有援閩各軍雇搭洋船分起裝載啟

行各緣由謹繕摺由驛馳陳伏乞

皇太后

皇上聖鑒謹

奏

援閩未便分兵援粵片

同治四年二月初四日

再正緒揭開匪兩廣督臣毛鴻賓廣東撫臣郭嵩燾咨稱漳州以

西漳浦雲霄平和各城環粵邊數百里皆爲賊踞賊眾現屯聚閩

省而其出路則在粵省閩軍由東北漸次兜圍蘇軍再由廈門南

面進攻則漳州三面被剿必由西路全股入粵請分軍由汕頭登

岸會合粵軍由詔安規復雲霄平和等城以斷竄路等因臣查賊

初入閩本自粵東邊界取道竄陷龍漳各城現在粵省方耀等軍

進紮永定上杭等處計與閩省龍巖州各營可以聯絡遮截則北

路之防較固惟賊勢併趨閩中腹地據探報康逆仍欲會侍逆北

竄江西似江閩各路兵力足資防制左宗棠慮其勾結盜艘洋船

竄擾沿海一帶郭嵩燾等慮其被剿窮蹙西竄潮州一帶皆在意

料之中臣派郭松林楊鼎勳等由廈門進兵正當沿海一面但夷

情區測孤軍遠出本宜合而不宜分且已與洋商議定赴廈閩省  
官軍皆知蘇軍由彼處會剿更未便改赴汕頭惟密飭郭松林等  
到廈後察酌賊勢穩慎進取須先截其窺伺海濱之路如將來賊  
股併趨入粵就近跟蹤兜追以收夾擊之效除咨復廣東督撫外  
理合附片陳明伏乞

聖鑒訓示謹  
奏

李元度請免發遣摺

同治四年三月初四日

奏爲陳明已革臬司前功足錄母老堪憐可否懇

恩免其發遣恭摺仰祈

聖鑒事竊臣等接部咨同治三年十二月十九日奉

上諭已革浙江臬司李元度著從重發往軍臺效力贖罪等因欽

此謹查此件部議全案臣等均未及見惟恭讀邸鈔所載前後

諭旨知李元度於罷職後被言官撫拾前事奏劾曾國藩復自陳

前參本屬從嚴李元度原有兼人之才懇請酌量錄用左宗棠查

奏亦稱原參各節失實而咎由自取各等語是李元度功罪始末

早在

聖明洞鑒之中臣等竊仰體

朝廷追念前勞愛惜人才之意有不能已於言者彼此緘齒不謀



而合用敢臚陳事蹟于瀛

多利

聖聰李元度以湖南舉人集練起軍咸豐五年汨八年轉戰撫州建昌廣信一帶常以數千之勇當石達開楊輔清數十萬之眾軍無宿糧惟以忠義激勵士卒每戰則自策馬出陣礮子集於頰血濡袍袖危險不顧臣葆楨實親見之弋陽貴溪廣豐玉山諸縣卒賴保全當是時江西糜爛微元度力戰大局幾壞咸豐十年守徽之役賊已偪門庭空無備禦元度倉猝入城受代甫數日而陷非戰之罪也當經曾國藩奏參革職拏問臣鴻章實力爭之欽奉文宗顯皇帝諭旨有李元度謀勇兼優挫衄可惜人才難得之語遠近聞之莫不感涕嗣帶勇援剿湖北江西尋擢授浙江臬司時江浙徧地賊氛元度以偏師走數百里追剿乃飾報勝仗而不能救杭州之失既再被劾率請裁撤所部索領欠餉又失之急迫種

植獲咎誠如部議所云罪有愆得臣等亦無庸代爲申辨惟李元度少孤其母守節數十年撫此一子年近七旬家無次子元度今蒙重譴方將遠離救水之養託付伊誰桑榆之以日夕莫保計荷戈赴戍之日卽倚閭水訣之時懸想此情實堪矜憫臣葆楨前在廣信府任內圍城岌岌賴元度犄角救護其事數年見其能耐艱苦忠勇奮發遂聯爲姻親矢同心力以報

國家非爲私也臣鴻章曾在曾國藩軍中知元度頗深嘗謂其血性足以幹事而知人則不甚明其才識足以謀事而帶勇則非所長當咸豐三四年間曾國藩在湖南練勇造船百凡草創人多視爲難事惟元度獨信從之厥後進剿江鄂軍情之利鈍不一局外之謗議多端人或視爲畏途惟元度常左右之一時名將如塔齊布羅澤南李續賓楊岳斌等皆與元度深相交契臣玉麟臣超與

其忠難十餘年而不料其敗奇若此也近世提振東南全局首推  
曾國藩與前湖北撫臣胡林翼查咸豐八年二月開胡林翼特疏  
奏調李元度赴浙防剿稱其素性忠義才足任事十年五月薦舉  
人才疏中又稱李元度血誠果毅志節清嚴其同列刻章如左宗  
棠劉蓉暨臣葆楨等均蒙

特旨擢用若元度果無足取胡林翼亦豈肯再三密陳春秋傳曰  
善善從長惡惡從短書曰罪疑惟輕功疑惟重臣等各以所知證  
諸公論竊謂李元度後此雖有可議之罪前此究有不可掩之功  
且係節母孤子在平民例得留養況其曾爲

國家出力之人夫通下情宣上德人臣之職也以人事君之義臣  
等雖至愚陋不敢忘也拘嫌疑之小節置是非之大公或竊竊歎  
息相顧而不發一言又臣等所不敢出也伏思

聖朝微勞必錄

孝治方隆上年道員王沐因案發遣迨江西肅清臣葆楨陳其前功並以母喪未葬據實籲懇遂荷

恩施免其遣戍今李元度前功多於王沐而有母年衰情同一例仰惟

錫類之仁必在矜全之列所有已革浙江臬司李元度可否懇乞天恩免其發遣之處出自

高厚鴻施如蒙

俞允該革員應繳臺費銀兩即由臣等公同捐廉代繳合並陳明謹會同兵部侍郎署漕運總督臣彭玉麟浙江提督臣鮑超合詞恭摺具陳伏乞

皇太后

皇上聖鑒訓示謹奏

添練馬隊片

同治四年三月二十二日

再劉銘傳周盛波各軍現留院防剿捻逆聞捻馬多而且悍平原曠野騎戰尤宜臣軍向在江南專用步隊陸路剿捻則不利於馳驟追逐據劉銘傳商請添練馬隊擬派參將崔萬榮帶同馬勇王春德等赴古北口張家口一帶挑買戰馬五百匹剋日回營以備急需除咨兵部請給印票並移行經過各省照章喂養接遞護送外相應請

旨敕部知照各關口將崔萬榮等戰馬按數查驗照例免稅放行謹附片陳明伏乞  
聖鑒訓示謹

奏

各軍分援淮徐摺

同治四年四月初四日

奏爲遵奉

諭旨飭催各軍分往淮徐援剿恭摺覆陳仰祈

聖鑒事竊臣承准軍機大臣字寄三月二十四二十六等日奉

上諭迅飭張樹珊吳毓芬馳赴邳宿防守其劉銘傳一軍飭由蕭  
礪一路前進等因欽此查道員吳毓芬所部四營派赴揚州接防  
業於三月二十二日附片陳明在案先是漕臣吳棠來咨商調吳  
毓芬赴浦策應臣以揚州重鎮關繫緊要吳毓芬兵力本單未可  
遠離因檄令現守鎮江之廣西右江鎮總兵張樹珊統帶樹字六  
營護軍一營洋鎗隊馳赴清江相機堵剿據報已於四月初二日  
自鎮城拔隊渡江又准督臣曾國藩咨商添派遇缺提奏臬司張  
樹聲前往淮徐查張樹聲係張樹珊之胞兄久歷戎行謀勇兼優

今年正月經臣調蘇總理營務釐局藉資歷練臣商調該員赴徐督剿翼於軍務地方均有裨益臣卽飭令該臬司於三月二十九日起程北去連准吳棠咨函捻逆大股竄至邳州沭陽境內清江萬分喫緊臣又嚴催張樹聲張樹珊等督隊兼程計日內必可抵浦淮揚鎮總兵歐陽利見帶所部礮船四十號計亦早抵清江得此水陸兩軍合之淮徐原防兵勇分布扼剿裏下河門戶當可保固該逆不得逞於海流恐將由徐邳回甌蒙毫准曾國藩咨會已調直隸提督劉銘傳會同遇缺提奏提督周盛波等統率所部由六安前進臨淮徑赴徐宿一帶防剿臣又疊加咨催該提督等迅速拔營迎頭截堵惟臣部各隊所用外洋鎗礮軍火繁重異常疊經

奏明在案以之摧鋒陷陣較可得力第轉運笨滯又無馬隊可利



通行北路陸多於水擒逆騎多於步流竄無定飄忽靡常誠恐各營爲軍裝步行所累或不能疾馳速追又甫經調剿擒匪地勢賊情均未熟悉亦須慎重布置臣仍隨時諄飭各統將合力兜剿勉赴事機並咨請督臣漕臣就近調度所有遵

旨派撥各軍分往援剿各緣由繕摺由驛覆陳伏乞

皇太后

皇上聖鑒訓示謹

奏

許關暫緩徵稅摺

同治四年四月十四日

奏為許墅尚未設關擬請援案暫緩徵稅另行籌款辦運恭摺奏祈

聖鑒事竊照蘇州織造所管許墅關向設省城西北三十里地方咸豐十年蘇州失陷該處關署民房俱被賊毀克復後商販稍通而南北大宗貨物尚未暢行建署設關經費無出該織造是以未能遽請開關臣因軍餉支絀不得已就地擇要設卡抽釐慎選廉幹之員核實經理並飭總局司道綜覈稽查按月分表旺牽計每月收捐錢數萬串所有防兵餉需及援剿閩省淮徐各軍糧餉軍火並內河水師修船船隻均賴此款湊用統歸軍需案內報銷是釐卡實餉源所自出關係至要難遽議撤前任織造文燧現任織造錫祉因大關未設又設法就巡徵稅而子口過多散布百數十

里間商民因與舊制不符屢至臣衙門中訴似於政體輿情均未甚協聞錫祉到任八箇月僅徵稅銀五千餘兩各口零星攢湊每月共不過六百餘金得不償失已有明證即令撤卡設關衙署多所開銷丁胥從而苛索斷不若釐卡委員各專責成遞相鈐制其所徵自不敵釐卡之數而稅捐同一來源不免互有藉口查杭州之南北兩關江甯之龍江西新關均因徵稅寥寥經左宗棠督國藩先後奏請暫行停徵在案許關事同一律且兩利相權則取其重應援案請

旨一體暫停徵稅俟蘇省防軍盡撤南北商貨流通由臣等察看情形奏明辦理復歸舊制該織造每年織辦大運綢緞及各項活計均屬要需從前山蘇州藩庫撥銀解濟咸豐四年前督臣怡良兼署織造諭知藩庫撥餉浩繁奏准在關庫自行動用今該關巡

口雖多收數太少於織辦要工究無裨益徒滋紛擾臣內外兼籌悉心酌核與其關稅有名無實且礙釐捐莫若織款分撥釐金同歸實際溯查咸豐七八九等年派辦大運緞紗每年計報銷六七萬餘兩漕庫撥銀三萬餘兩至四萬餘兩不等餘由關稅項下開銷彼時江南未復似係彙派兩處應辦之數是以需款較鉅今江南織造已由督臣

奏明撥給辦理自可分任其勞所有蘇州織造衙門除應辦

陵

廟要工由該織造隨時會商蘇漕司籌撥濟用期無貽誤外其有大運等項工需卽由臣核明於釐捐內酌撥銀錢交該織造分別緩急量爲辦理隨時咨部備查每年撥款以三萬兩爲率至奉派大運緞紗若挨年辦理實恐力有不逮可否仰懇

聖恩俯念瘡痍之餘元氣未復准將一屆應辦之數分作兩年辦理則時日既可舒徐經費亦資周轉當可不致延誤再蘇州織造養廉前

奏明每年在於藩庫酌借銀一千兩其餘司庫庫使等員並由外酌量支給查該織造兼管蘇州每年其例支銀一萬六千兩今關稅議停織務仍舊擬請照原額減去四分之一仿照浙省成案亦在撥捐項下每月撥銀一千兩作為織造養廉及該衙門書吏匠役紙張飯食各項用費俾資辦公臣為慎重要工起見是否有當謹繕摺具陳伏乞

皇太后

皇上聖鑒訓示謹

奏

酌度軍情無庸出省督勦摺

同治四年四月十四日

奏爲酌度南北軍情暫無庸出省督勦恭摺覆陳仰祈

聖鑒事竊臣飭催劉銘傳張樹聲各軍馳往淮徐援勦並郭松林  
楊鼎勳兩軍先後起程航海援閩各情業於三月初四月初四  
等日專摺馳報在案嗣據張樹聲張樹珊等稟稱已於初六日統  
帶樹字等七營行抵清江適捻股回竄邳州沭陽境內清淮空虛  
該軍暫紮河北鎮定人心並准酒臣吳棠函稱邳宿運河已經各  
水師布扼清淮原防陸軍已悉數派赴宿北堵勦應令張樹聲等  
暫行扼防裏下河門戶俟劉銘傳等大隊到齊即可相機並進合  
力兜擊又據宿遷縣知縣吳元漢探稟初九日捻逆回竄經官軍  
擊敗遂向山東郯城馬頭集西北一帶逃竄等語恭讀輿次  
寄諭以揚防已撤清淮兵單恐裏下河完善之區或有疏虞又奉

四月初四日

寄諭該督撫應否出省前赴江北督剿之處著酌度辦理迅速馳奏等因仰見

聖主廑念要區指示機宜易勝欽悚如果捻蹤逼近清淮吳棠獨力難支臣等先其所急自應帶隊出省會同督剿惟從前捻竄海州時吳棠已商調水陸各營分布扼守嗣回竄邳沭界內距清淮將近二百里黃翼升暨歐陽利見等水師與張樹聲等陸軍先後趕到劉銘傳於初六七等日周盛波於十二日自六安分起拔營亦克期可至聲援已壯賊蹤愈遠襄下河斷可無虞卽淮徐各郡必可保守臣身任地方籌兵籌餉兼辦洋務百緒紛煩未便遠離惟隨時會商督臣漕臣妥爲調度並飛催劉銘傳周盛波張樹珊等相機前進會合兜剿以期顧全大局仰慰

聖座至福建陸路提督郭松林統帶所部由上海乘坐輪船於三月初四五等日抵廈門登岸十三日進紮漳州城外鎮南一帶十六日會同閩軍擊敗大股援賊於赤嶺擒斬約二千餘人記名提督楊鼎勳亦督所部於三月十五十七等日抵廈擬即由海澄進漳州南路聯絡協剿惟聞漳城賊守甚堅人數甚眾又有洋匪接濟軍火雖經盤獲數案但沿海廳縣多被賊踞尙未能一律禁絕李世賢汪海洋皆著名悍逆負固巢穴難遽卽下即使漳州攻克恐將由粵界出竄江楚邊境固須嚴備蘇浙後路仍當豫防臣所派援閩各軍隨時由海道酌濟餉項軍火南北軍情似應兼籌並顧所有酌度情形暫無庸出省督剿各緣由繕摺由驛馳陳伏乞

皇太后

皇上聖鑒訓示謹



奏

附錄

三

餉票收捐停止片

同治四年四月十四日

再臣前奏收捐餉票一案准戶部議照例定銀數請獎並仰裁撤  
勇丁欠餉不照馮子材報效之案而援富明阿補發之案自係未  
便強令報捐但現在所遣之勇是否全係從前欠餉之人豈無先  
經遣散傷亡革退等項事故爲數既有七八百萬何以圖圖其詞  
並無確數亦未截清住支餉銀月日若所欠係在三年六月以前  
自必歸入無庸報銷之內當飭承發各員潔已奉公勿爲旁人竊  
議至所部勇丁爲數若干所欠發者究係某年某月應發之餉如  
何設法俾此項歸於實用令人一目了然毫無疑義之處應令悉  
心酌核妥議具奏等因伏查臣部水陸各營多係楚師閒有添募  
淮勇仍照楚章辦理楚軍驍果善戰惟餉銀不能短少凡補發欠  
餉裁撤勇丁均以實銀補給其傷亡者於補發時由營官交其家

屬具領革退者卽時挑選頂補以點驗之日起支曾國藩等裁撤各軍均不能以餉票抵給此其明證臣因新復各縣錢糧多未啟徵上海稅捐日絀遣撤無此鉅款不得已奏請試行餉票原爲國計酌劑盈虛起見而楚軍不願領票者居多非特不便強令報捐且不能強之領票馬子材所部本皆金陵潰散之餘當時倉猝招留急不暇擇繼因欠餉甚鉅雖明知疲羸居半欲簡汰而勢有不能自臣到蘇後按月由上海撥濟銀三萬兩始陸續挑換訓練部議所云後來頂補之人豈復與聞從前欠餉之說切中鎮江軍營情事與曾國藩及臣所部情形不同然鎮營欠餉猶以餉票抵放收捐請獎至百餘萬之多始將下餘欠餉陳請報效是鎮營之報效不在全軍撤防餉票捐竣之後推行自有次第今欲期之於餉票擬辦之初似覺操之過急雖臣所部貴州兵營忠字勇營亦

有報效欠餉請廣學額者然非全軍盡撤集有成數不敢零星奏報士卒衝鋒陷陣出生入死幸而凱撤還家各有父母兄弟妻子皆望其攜帶銀錢共資生計若事平後欠餉責令報效概作罷論誠如部議非統兵者所能強也臣所統水陸兵勇總數節經咨報軍機處兵部有案所放餉銀在同治三年六月以前者亦於清單內專款開列並於酌議奏報清單章程內聲明三年六月以前欠餉綜計裁餉餉票若干另款開報原所以杜牽混而清眉目臣奏請收捐餉票時部下兵勇有酌議裁撤者有留防蘇松常鎮及先後調派剿捻援閩駐揚而至今未撤者本屬參差不齊全軍既未盡撤餉銀即無從截數馮子材報效之奏必在全軍盡撤之時豈非其時則報效之數亦無從核見也臣前因急欲裁遣先行約略具奏原擬俟餉票截止另行核確敷造冊奏咨並非有意圖圖

其詞在戶部實事求是必應以報冊爲憑卽臣處按營核欠亦須以事竣爲斷其在三年六月以前各營欠餉若干發過餉票若干擬俟第二案清單奏報後卽截清造報在三年六月以後者放餉尙無止期欠餉尙無定數將來總須核實報銷本不以七八百萬作爲定論斷不致爲人欺朦所定餉票章程飭歸蘇州藩司刊刻刷印各營領票俱有鈐領爲憑由放餉委員核對欠餉月分銀數相符隨時申請藩司照數填票並於票內注明某營字樣頒發給領互相稽考均歸實用俟辦竣造冊報部自當一目了然如欲先將各營欠餉逐一查明月日截清確數再議收捐餉票非全軍盡撤不可若待全軍盡撤始議收捐餉票則與糧臺之歸補捐名異實同若令已裁之兵勇散處郡邑坐俟全軍盡撤截清欠數奉部議准之後再將餉票出售報捐然後起程回籍不惟易滋事端且

恐若輩無此資斧此又事理之不可行事勢之不能行者也惟自  
上年十月奉

旨允准開辦以來發過餉票銀僅將近五十萬兩收捐則尙未及  
半頭卯請獎冊又奉部發還捐生頗多觀望餉票卽難流通部臣  
旣以收捐爲疑兵勇又以領票爲苦擬請卽行停止將來只有月  
議設法籌補其已發之票仍照部議收捐每屆三月請獎一次以  
昭大信俟收完後將已領餉票若干同已經報效數目另行詳晰  
奏咨並先咨覆戶部查照外合將欠餉驟難截數查明給發餉票  
並無弊混及現擬停止緣由附片具陳伏乞

聖鑒謹

奏

請將奉天糧穀在內地商船販運摺

同治四年四月十四日

奏為奉天等處雜糧米穀請准內地商船與北洋豆貨並行販運  
恭摺奏祈

聖鑒事竊牛莊等處豆貨請照約禁止外國夾板等船裝運仍歸  
內地商船轉運經臣奏奉

諭旨該衙門議奏欽此旋准總理衙門咨稱俟與英國公使議有  
章程再行辦理迄今數月尚未知能否議准而上海沙衛等船資  
本虧折停泊黃浦港者甚多日久朽壞生計竭蹶於大局殊有關  
礙本屆蘇省新漕及采買米石不及四十萬沙船已不敷裝兌若  
將來江浙全漕同時海運沙船日少從何辦理臣已於本年正月  
間出示曉諭將該船等助餉捕盜及油豆餅各捐一體酌減三成  
以示體卹而商情困敝滬市蕭條仍復日甚一日殊可危慮茲據

船號商王永盛等稟稱近年商船虧本停泊推原其故一由於北  
口之油豆餅被夾板船搶裝運出貨少價昂一由於商船本小者  
無整宗販運之貨素悉奉天等處雜糧米穀出產最多進本較輕  
現在江浙雖已肅清開墾荒田尙未一律成熟米糧騰貴民食維  
艱擬請以雜糧米穀與油豆餅並行販運庶資本輕重均可營生  
沙船不致全停民食更資接濟惟奉天等處雜糧米穀向不准華  
商販運而洋商轉得裝運往來獨佔其利伏查通商稅則米穀雜  
糧不拘內外土產不分何處進口皆不准運出外國惟欲運往中  
華通商別口則照銅錢一律辦理等因是米穀雜糧既准外國商  
船裝運中國商船似可援照准辦亦係此口運至彼口與例相符  
稟求

奏請開禁准令而等於奉天等省裝載雜糧米穀與油豆餅並行



販運等情由江海關道丁日昌轉詳請

奏前來臣查奉天等處所產米穀不准販運出口係防奸商濟匪起見該船商均係安分良民可無慮有濟匪情事況通商條約米穀雜糧既准洋商仿照銅錢之例出具保結請領執照轉運通商別口而內地商船轉不在其出口未免向隅上海關稅以沙船爲大宗近因沙船停泊稅餉日絀若早將登州牛莊兩處豆貨定議按約專歸內地商船轉運並准將奉天等處糧食與油豆餅一律販運則船商得有益各自踴躍開行無停朽之患不惟稅捐可期起色卽每年海運漕糧需用沙船不致缺少實於籌餉運漕國計民生均有裨益合無仰懇

天恩敕下總理各國事務衙門會同戶部迅速核覆准行所有奉天等處雜糧米穀請在內地商船與北洋豆貨並行販運緣由理

合恭摺具陳伏乞

皇太后

皇上聖鑒訓示謹

奏

援閩獲勝會克漳州府摺

同治四年五月初六日

奏爲援閩蘇軍會合浙軍分路進倡疊獲勝仗踏毀城外賊壘乘勝克復福建漳州府城恭摺仰祈

聖鑒事竊福建陸路提督郭松林記名提督楊鼎勳率師先後由上海乘坐輪船至廈門登岸進紮漳州城南及三月十六日郭松林會同閩軍擊敗大股援賊於赤嶺均經臣於四月十四日奏報在案四月初十日郭松林所部由城南鎮門進紮東山城中悍逆悉數出撲楊鼎勳派隊相助鏖戰移時獲勝城逆不敢復出十一十二日適有同安土匪之變郭松林抽隊往剿幸於十八日竣事東山在漳州城南十里係通漳浦大路郭松林以八營扼之又十里爲鎮門係東山海澄石碼適中之地楊鼎勳以五營扼之海澄縣爲兩軍後路有山徑可通漳浦復派三營分佈縣城內外防賊

抄擊適獲賊書知侍逆求救於康逆約由龍岩漳平來援時總兵  
劉運捷臬司王開榜各軍皆在西北提督高連陞黃少春等軍在  
東路自蘇軍扼紫東山南路已斷惟北路之梗內寨烏頭門及東  
路教子橋東岳廟等處該逆築壘數十座皆悍賊主之以爲犄角  
各壘不破東北官軍勢難會合倡攻二十日郭松林預派松字營  
由石亭仔小浦南前進使賊首尾不能相顧另挑洋鎗隊五百名  
會同勦字五營五成隊親督至翰林洲地方駐宿是夜三鼓沿山  
疾行直抵烏頭門左側適東路高連陞等三軍亦至楊鼎勦卽派  
副將張遵道記名提督黃中元直搗賊前總兵王萬釗舒義志周  
河清繞出通城大路掩襲賊後郭松林派總兵朱德鴻謝連陞擬  
保游擊馬宗駿等從旁夾擊該逆面面受敵死拒不退我軍愈攻  
愈猛將侍逆之叔僞老王宗主營踏破餘賊俱潰郭松林楊鼎勦

軍截殺斃賊極多花翎守備周有泉被礮子穿胸陣亡樓內寨  
之賊驚潰敗逆向南靖一路紛逃各營追剿數里當會同高黃等  
軍折回東南將東關外教子橋東岳廟及附近南門新橋各賊壘  
一律蕩平維時郭松林派出石亭仔小浦南進兵之提督易川剛  
總兵李長樂曹仁美副將郭文武王德駿等乘勝直抵至城根楊  
州勦又飛調提督銜總兵高占彪副將朱興榮已革廣東候補道  
段詰帶隊循河南岸依護廣東補用知府葉文瀾率礮船乘晚潮  
駛入助赫水陸各隊正仰攻閒值高黃兩軍師至均用火箭射入  
城中攻之益急各軍趁勢登城侍逆冒火突燬潛開西門而遁遂  
於四月二十一日夜克復漳州府城郭松林楊鼎勦隨派各營疾  
趨漳浦沿海兜剿並圖規復漳浦雲霄詔安各城據郭松林楊鼎  
勦馳報請奏前來伏查侍逆久踞漳州恃有東北城外多壘負固

不下並喉使同安土匪擾我後路屢次勾結洋匪思購輪船入海  
旁竄計甚狡毒此次援閩蘇軍遠涉重洋數千里擣虛批吭足伐  
賊謀初至時士卒病憊倍嘗艱苦洎由鎮東山節節滾紮而入先  
斷南通漳浦下海之路會合浙軍連番血戰迅掃城外賊壘遽拔  
堅城各將士實爲奮勇陣亡之花翎守備周有泉應請

敕部照陣亡例從優議卹統領松勳兩軍之將福建陸路提督郭  
松林遇缺題奏提督楊鼎勳前已蒙

恩賞穿黃馬褂郭松林並有雲騎尉世職此次越境遠剿力挽全  
局應如何

加恩之處伏候

聖裁楊鼎勳訓練精嚴謀勇兼優並請

旨卽行簡放實缺其尤爲出力文武各員另繕清單恭呈

御覽顧懇

恩施其餘蘇軍各營應獎應卹人員可否由臣查明彙奏除浙閩各軍會剿情形由左宗棠詳細具奏外所有援剿蘇軍會同克復漳州府城各緣由恭摺山驛馳陳伏乞

皇太后

皇上聖鑒訓示謹

奏

密陳剿捻事宜片

同治四年五月初六日

再密陳者僧格林沁督師數載屢次剿滅大股賊匪實爲

京畿屏蔽北路保障今變生意外賊勢復張念

國家之多難痛老成之凋喪臣聞信之餘憂惶無措初以爲捻逆

晝夜急馳避兵亂竄勢已窮蹙有僧格林沁追剿可期旦夕撲滅

曾國藩與臣專防江皖協剿聞賊但使沿江沿海水路通行之處

自度兵力尙可制之臣軍由江南剿賊入手本宜水而不宜陸嗣

因西洋火器精利倍於中國自同治二年以後分令各營雇覓洋

人教練使用炸礮洋鎗之法傳習日久頗窳奧妙故派往南路戰

守稍有把握而各營軍火輒重視他軍尤爲煩多曾國藩所立楚

軍營制每營五百人僅用撞鎗小鎗一百二十餘桿臣軍每營則

用洋鎗四百餘少亦三百餘桿洋藥銅帽每開一仗則須數萬斤



其開花礮隊礮具之笨重藥彈之繁冗每出一仗則須數十巨艦裝運此非他人所能深知他省所能接濟者也楚軍營規無論調援何處事勢緩急仍守古法日行三四十里半日行路半日築營糧藥隨帶到處可以立腳勞逸飢飽之間將領節養其氣力體卹其艱苦是以用兵十餘年卒能成功爲其能自立於不敗之地致人而不致於人臣軍陸戰亦用此法此又非他省將帥所能仿行非他軍但圖野戰不肯紮營者所能合一者也往見僧格林沁統帶馬步隊窮年累月逐賊而行到處掠食不於險要形勢及賊匪歸路竄路布置扼紮以逸待勞竊疑其用兵別有師法又慮疲憊日久將有大挫而未敢越俎建言伏讀疊次

寄諭飭該親王持重養銳冀其或稍省悟不謂竟以此一蹶弗振然其忠勇勤勞實非諸臣所及臣等能毋深痛曾國藩威望忠略

特出冠時仰見

聖明倚任得人惟以儒臣帶兵向未騎馬督戰又自金陵克復東南漸就肅清所部兵將陸續裁撤惟鮑超一軍最爲得力近又潰變嘗與臣齊精力頗愜願求退息臣方極力勸阻外省調兵各事臣方竭力相助目下事機緊急關繫重大尙未接准來函想必仰體

聖慮剋期就道惟江西鮑超遺勇無人收拾滋蔓可虞漳州雖已克復據郭松林楊鼎勳函稱賊必由廣東邊界上竄江西是皖南蘇常防備益須嚴密臣軍分防蘇境三萬餘人內水師居多不能遠調陸師僅侍講學士劉秉璋十營常鎮道潘鼎新十營總兵王永勝劉士奇等十七營尙屬大枝勁旅若南路有警卽須分投堵剿會國藩若再商調似亦不能多派致海疆餉源重地或有疏虞

昨已緘商曾國藩現在劉銘傳已抵徐州張樹聲周盛波已抵宿遷該三軍其一萬七千餘人合之可當一面請該大臣酌留調遣  
屢奉

寄諭嚴催劉銘傳繞赴直隸口應先其所急護衛畿疆前接該提督來函云由六安趨程二十餘日始抵徐防該軍全係步隊拔行笨帶軍裝尙多落後卽繞道赴直行走需時軍火糧餉各省未能接濟曾遺役士卒必多病憊若令飢疲逐賊轉恐損銳且曾國藩既奉

命北征兵將素習正可藉資驅策臣竊料黃河寬深洄急該地方官但將渡船收提沿河北岸分責兵練扼守多置疑兵該逆斷難飛渡更請

特旨嚴飭該督撫於賊到地方督令郡縣各守城垣紳民各守圩

塞萬一偷渡北竄當不遽擾亂大局曾國藩督兵繼進先聲奪人諒可驅賊他走至目今欲圖制捻之策臣愚以爲非令直東皖豫各省居民堅壁清野官督民團去邪扶正認真辦理則賊得就地覓食擄人鬻黨爲患竟無底止非令各省整練步隊勁旅扼要紮營伺近邀擊則賊得任意去來徵調徒增疲乏無裨實用非令各將帥多練馬隊則無力兜追剿辦殊難痛快東三省騎兵尤宜趕緊添練以備北方明末流寇嘉慶年間川楚教匪正與此股捻逆情形相似辦法亦須參仿曾國藩及臣部各軍於北省地勢未熟賊情亦異又無馬隊可利馳逐當徐籌變通之方斷不能如僧格林沁之神速各省會剿責成督撫須擇真正知兵者同心合力以期有濟近來練兵調將往往似是而非軍情隔膜應請皇上於久在軍營帶勇著有成效文員中慎選擢用假以便宜不

責速效而求遠略不驚虛談而考實濟庶緩急可恃而殘寇可漸  
滅矣臣因事勢危迫冒昧直陳未知有當萬一否伏乞  
聖鑒裁擇施行謹附片密

奏

郭松林剿辦同安土匪片

同治四年五月初六日

再郭松林於四月十二日接提督篆後卽據興泉永道鄧廷桂等函報同安縣西鄉土匪暗受侍逆喉使聚眾攻城冀擾官軍後路城內止有水陸提標兵六百名勢頗危急郭松林卽親帶二營五成隊伍星夜馳往十三日午刻已至同安隨向官紳詢悉該邑西鄉一帶匪徒最多者有上宅村張僻許井鄉張卓張禱古山鄉洪甜橄欖嶺大鄉邵敦外教場鄉楊聯八社半鄉陳晉陳懷官淳林厝塘林振等皆勾通髮逆而張僻張卓張禱尤爲著名匪首上宅村離城僅及十里郭松林卽掩其不備冒雨馳赴該逆鳴鑼聚敵郭松林先令隊伍圍定仍分三路進攻鎗礮環施賊敗入村官軍乘風縱火分頭截殺生擒張僻之叔張振奪獲太平天國中軍主將黃旗一面擡鎗五十餘桿時已昏黑搜出火藥數百桶分布轟

燒上宅村賊巢及羣賊均燬洗無遺回軍後會同前興泉永道曾  
憲德馳諭古山等家長令將洪甜等匪首捆送以免搜剿十四日  
卯刻復率隊至離城三十五里之許井鄉該處背山臨海環村長  
牆遮護均有礮眼逆眾遂排列三四千人山巔並豎黃旗郭松林  
派馬宗駿帶隊由左路進洪寶麟王興明帶隊由右路進自率小  
隊與曾憲德攻其中路令包國挺帶馬隊於山後抄擊葉文瀾陳  
謙恩於海汊緊追兜剿該逆見官軍四路分開亦即分路來撲並  
於牆內用烏鎗狙擊郭松林先破其中路左右兩軍亦爭先陷陣  
逆眾潰退山巔賊見長牆已破即舉放煙火山後之賊忽翻山湧  
下我軍鎗礮連環轟擊適包國挺帶隊抄至山後奮力衝殺逆眾  
後路先亂官軍兩面夾擊各路乘勝包抄截殺縱火焚村陣斬及  
鎗斃千餘人其海面拖泊匪船百餘號爲葉文瀾等盡行焚燬敗

匪被迫入海疆沈無數許井鄉賊巢亦平其逸去匪首按名先燒  
房屋仍由該地方官緝拏訊辦郭松林卽於十七日帶隊折回漳  
營據該提督馳報前來臣聞福建泉州府同安縣西鄉向稱悍惡  
抗糧拒捕形同化外此次膽敢勾通髮逆聚眾攻城尤屬罪大惡  
極郭松林兩日之間勦撫兼施蕩除巨患辦理尙爲妥速除陣亡  
弁勇由臣核給卹銀外所有勦辦同安土匪情形理合據情附片  
縷陳伏乞

聖鑒謹

奏



署理總督籌辦大概情形摺

同治四年五月初六日

奏爲欽奉

諭旨恭謝

天恩並籌辦大概情形恭摺奏祈

聖鑒事

竊臣

於五月初四日承准軍機大臣字寄四月二十九日

奉

上諭曾國藩著卽攜帶欽差大臣關防統領所部各軍星夜出省  
前赴山東督剿兩江總督已有旨令李鴻章暫行署理卽著前赴  
金陵接印任事兩江任大責重李鴻章務須悉心經理仍隨時與  
曾國藩妥商曾國藩軍營調兵集餉各事宜該撫並當妥爲籌畫  
不得稍有遲誤等因欽此當卽恭設香案望

闕叩頭祇謝

天恩伏念臣吳疆承乏三載於茲雖思竭慮以效忠竊愧過多而功少仰荷

酬庸曠典

異數疊加兄弟同列封圻將佐多膺專閫每念寇氛未靖時事多艱輒互相儆戒懼有隕越致負

聖主倚畀之隆茲復

特降恩綸暫權督篆間

命震悚日夜旁皇竊以臣籍隸安徽該省係總督兼轄例須迴避又兩江政務殷繁所屬蹂躪已久彫瘵萬分善後各事兵餉二端在在棘手誠如

聖諭任大責重微臣才智短絀非所克勝揣分量力必應籲辭同請惟親王們格林沁剿賊陣亡捻氛日熾直東一帶失此長城中

外震驚

甯川憂勞急盼曾國藩前往督師需人接替臣何敢拘泥常例引  
嫌避位致誤事機擬卽料理交卸馳赴金陵暫行接印此開善後  
如潯河興學撫卹農及常鎮招墾荒田上海通商洋務均次第  
辦有端緒藩司劉卹齊接護撫篆情形熟悉地方一切可無貽誤  
惟蘇境水陸防軍三萬餘人均已分布各隘又援剿福建之提督  
郭松林楊鼎勳兩軍其八千餘人援剿徐州淮揚之提督黃翼升  
劉銘傳周盛波臬司張樹聲道員吳毓芬等軍其二萬數千人除  
黃翼升李朝斌兩枝水師係曾國藩舊部餘皆由臣募練而成各  
軍餉糧軍火專指蘇滬稅釐歷經奏明在案統計每月餉需及製  
造采辦各項雜支額款將近五十萬而蘇滬稅釐及藩庫地丁牽  
算月入不足三十萬挪東拖西儘力湊濟雖前敵各營時時匱乏

呼號徒以恩義相維尙不至於譁潰臣獨心憂之是以疊次奉撥  
京餉義不敢辭甘餉迄難定數每月能解一萬已爲勉力臣非忍  
愬置西陲實迫於不容已也臣暫署督篆距蘇較近所有調度兵  
將籌畫餉需自當引爲己責隨時會商曾國藩照章悉心經理以  
期仰副

宸廑至通商篆務係臣兼辦現未奉

明諭臣謹暫帶通商

欽差大臣關防前往隨事飭令江海關道丁日昌等妥爲辦理仍

請

旨定奪除俟交卸起程續行馳報外所有接奉

諭旨恭謝

天恩並籌辦大概情形理合繕摺由驛具陳伏乞

皇太后

皇上聖鑒訓示謹

奏

海關應撥北新贛州太平三關絲稅請免補解片

同治四年五月初六日

再上海初設洋關時內地商人販運湖絲來滬議令補納北新贛州太平三關稅課由江海關代為徵收除太平關稅數由該關核入額徵

題報所收銀兩仍彙入江海關洋稅報解向不解還外其北新贛州二關按月截數造冊撥還嗣開辦新章在洋商領照自赴內地買絲完納半稅因自咸豐十一年三月二十三日起無論中外商人運來湖絲一律改完內地半稅免補三關稅課經前撫臣薛煥具

奏在部議以太平等三關絲稅既歸入江海關徵收應俟一年期滿將其完內地半稅若干報部照從前應徵之數酌量比較撥補

三關等因是雖有撥抵之虛額究不必有補解之實銀自咸豐十  
年四月以後蘇省軍務愈緊餉需浩繁各該關道儘數湊放歷經  
奏咨有案雖聲明俟軍務平定再行籌補但愈積愈多以數十萬  
之鉅款斷無彌補清理之曰據江海關道丁日昌疊次詳請  
奏懇免補前來臣查上海通商之始湖絲出口皆由內地商人轉  
運本應逢關納稅是以令其補納三關稅課今在洋商自赴內地  
買絲卽由洋商逕運粵東亦祇照章完一半稅無逢關納稅之理  
是所謂三關絲稅名實顯屬不符部議仍於半稅項下比較撥補  
三關蓋恐該三關稅額驟減藉以抵補虧累耳然卽以湖絲半稅  
而論每百斤只收銀五兩並無耗銀而按照向例撥補三關每湖  
絲百斤北新關應撥正銀八錢五分七釐六毫贛州關應撥正銀  
九錢一分九釐一毫太平關應撥正銀一兩四錢三分二釐合其

應銀三兩二錢八釐七毫連加一耗銀併計其應銀三兩五錢二分九釐五毫七絲除撥三關外海關僅餘半稅銀一兩四錢七分四毫三絲原定章程實已偏枯況上海洋稅向以絲茶爲大宗近來湖絲每由甯波出口不必盡來上海茶葉自漢九開關凡楚西二省運出之茶均由漢九兩關徵收滬關雖有出口之茶竟無可徵之稅是以同治元年以前滬關月收至二三十餘萬兩自漢九添關後每月至多不過十餘萬除扣英法四成外僅存數萬今昔情形不同稅額大減而本省軍需及指撥京協各餉紛至沓來應接不暇更何能分餘力以補三關而北新贛州等關且以額稅爲詞或委員催提或撥抵別項海關無可籌付徒費文移臣愚以爲與其日久宕懸轉滋慘輻曷若因時變通務求實在合無仰懇天恩俯准將江海關現徵內地半稅項下應撥三關絲稅自咸豐



十年四月以後一律免其補解歸入蘇省軍需案內報銷並請嗣後悉照太平關舊案由江海關將代徵三關銀數按年劃清月造分冊移知各該關核人額徵數內

題報所入銀兩仍彙入江海關洋稅動放軍需俟軍務告竣防軍全撤儘數報解以昭平允而免延誤是否有當伏乞

聖鑒訓示謹附片具奏

派兵航海赴津招

同治四年五月初九日

奏爲遵

旨酌派兵將由滬航海赴天津登岸南趨東省藉固畿疆門戶並籌辦大略情形恭摺仰祈

聖鑒事竊

臣欽奉

諭旨暫署兩江督篆業於初六日繕摺馳陳旋又接奉五月初一日

寄諭德州一帶與河間接壤距京甚近尤恐蓄意北趨震及畿輔是江南援軍遲到一日則逆燄鴟張日甚一日後患將不可勝言李鴻章務當於所部各軍內商撥勁旅數枝速派得力鎮將統帶由上海乘坐輪船北駛或由膠州登岸西趨濟南或由天津登岸由景德地方南趨東省均著李鴻章酌量迅速辦理等因欽此仰

見

聖主審幾防患綢繆至周臣渥受

重恩瞻戀

闕廷誠恐逆眾銳意北趨畿疆稍有震驚則臣等罪戾滋大伏讀  
憂思寢饋俱廢頃准曾國藩來函以金陵所部洲勇早議全數遣  
散且南人北去難期得力擬即督帶淮勇劉銘傳周盛波張樹珊  
各軍前往等語劉銘傳等均在徐境由東南向西北節節兜進藉  
以遮蔽淮徐兼顧糧運後路勢不能遽繞赴北續奉初三日  
寄諭崇厚已起程取道景州前赴畿南又有劉長佑扼守大名一  
帶河岸似畿防漸嚴密惟慮兵力未厚若東南數道並進偏賊  
北趨則有防不勝防之勢臣所部各軍已大半出省援剿又須防  
閩賊回竄論事勢則緩急宜備實係不可再分論大義則輕重相

形必當先顧北面躊躇再四豈能恣然查有布政使銜常鎮道潘鼎新順天舉人原籍安徽自咸豐七年在皖北帶勇隨營協剿十一年克復三河後經曾國藩札調募勇隨臣東下同治元年以來疊次克復浦東各廳縣及浙西嘉湖郡縣上年湖州報捷奉

特旨賞穿黃馬褂嗣委兼統上海英國教練勇該員器識沈毅勇略兼優於洋人火器用法頗知究心所部鼎字淮勇十營洋鎗居多內有開花礮隊一營礮位器具皆臣陸續購自外洋爲中土難得之物堪爲海疆鎮守茲令由海道赴天津登岸進景州德州爲畿輔一助聲勢江海關道丁日昌適來蘇省臣與該道等面籌雇備輪船及將來接濟軍火各事宜潘鼎新感激

國恩矢圖報效願卽日整治行裝俟丁日昌將輪船雇齊率隊迅往該軍到天津後在直隸境內應由劉長佑酌量妥爲調遣入山

東境後應仍由曾國藩調遣該軍鎗礮隊軍裝子藥最爲繁重不比他處陸營可以輕齎行走其所到之處必須地方大吏派委妥員設法伺應陸路則多備車輛水路則多備船隻源源轉運庶可

按次趲行應請

旨敕下直隸督臣先派大員在津迎護豫備剝船往大沽接運再雇船由天津運河陸續裝運南下其開花礮隊或留重大者在津坐鎮酌挑輕礮隨隊行走由潘鼎新自行相機妥辦該軍初往北路地勢未熟人數稍單似宜循運河左右穩慎防期與劉銘傳等互爲援應則氣脈易貫運道易通並請

豫飭山東撫臣於該軍入東後一體照料至該軍航海遠役應由臣籌給行糧惟蘇省釐稅短絀出境及在防各軍需餉甚鉅每月僅放半關疊經奏明在案此次輪船雇價及五千人月餉立需八

九萬兩竟無力措此鉅款查本年奉撥滬關京餉二十萬臣已奏定分季撥解所有春季五萬兩業經匯解其夏季五萬兩該道正擬報撥今潘鼎新一軍赴津實爲

京畿根本起見事機緊要自應先其所急以公濟公仰懇

敕部准其暫行截用作爲該軍北援餉需嗣後仍設法籌解十萬兩以符本年派數再臣軍向例按照各營人數月給食米柴薪油燭等項出境遠勘勢難供支此次潘鼎新一軍援直應查照郭松林等軍援閩由閩支發成案無論在何省防剿卽歸何省接支勿得推諉貽誤該軍入直後每月餉項並請

旨飭令直東督撫按月各撥銀一萬五千兩爲數無多必應如期解濟無令缺乏其軍火一切要需他省未能措辦應由臣督令丁日昌隨時由滬籌撥搭海船運津交天津道轉解潘鼎新行營應

用所有遵

旨酌派兵將航海赴津籌辦大略情形恭摺出驛六百里加緊馳

陳伏乞

皇太后

皇上聖鑒訓示施行謹

奏

酌籌南路布置情形片

同治四年五月初九日

再蘇滬係臣軍餉源江北係曾國藩餉源防守均關緊要曾國藩由清江北去必可屏蔽清淮保固後路惟閩賊李世賢汪海洋兩股人尙眾悍現分竄粵東邊界並有月股由福建永定上杭回竄江西之謠鮑超霆營潰勇已竄至義甯新昌境內難保不勾結賊股乘虛內犯江楚邊界須有重兵堵剿若稍大意縱令該逆由建昌廣信邊境舊路竄入皖南則蘇浙餉源重地防不勝防臣軍分調遠省既無大枝勁旅可備游擊又無倉猝添募之餉實堪危慮臣擬俟潛鼎新拔營事宜部署略定卽交卸撫篆起程出江陰口乘輪船馳赴金陵曾國藩欲俟臣到江甯乃敢放心啟行亦爲慎重南路大局起見蘇松防務擬派翰林院侍讀學士劉秉璋統所部水陸十二營並鼎字水師一營會同江南提督臣李朝斌護撫



臣劉卹舒妥爲籌辦臣卽調副將張紹棠陸軍六營暨羅榮光劉玉龍兩起礮隊赴江甯接防改派南贛鎮總兵王永勝所統開字十營移紮東壩建平一帶並遵

旨飭令皖南防軍認真扼堵毋任敗匪內竄但徽甯江浙交界重山復嶺徑路紛歧防軍無多戰守殊無把握不若厚集兵力在江西建昌贛甯一帶嚴扼兜勒勿使一賊內窺腹地則蘇浙後路自可無虞查漳州克復所有漳浦南靖平和雲霄各城斷難久踞閩事必已大鬆該省主客各軍近四萬人似應酌調出省兼顧江西左宗棠洞悉賊情素顧大局可否請

旨飭下該督迅撥健將勁兵繞出江西邊界作兜圍之遠勢杜旬結之內患至前派援閩之提督郭松林楊鼎勳兩軍應令由閩繞赴江西湖南邊境相機迎堵兼爲江蘇遠固門戶該軍與蘇省隔

絕行蹤莫定籌濟爲難已緘商臣兄恂南撫臣李瀚章如該軍將  
抵湘境酌量解濟餉需並妥爲調度可則得力所有酌籌南路布  
置各情形附片具陳伏乞

聖鑒訓示謹

奏

援閩克復漳浦縣摺

同治四年五月十六日

奏為援閩蘇軍進攻漳浦疊次獲勝踏破城卡克復漳浦縣城恭摺仰祈

聖鑒事竊郭松林楊鼎勳等會同浙軍攻克福建漳州府城並已派營疾趨漳浦沿海兜剿各情經臣於五月初六日馳奏在案茲據報稱四月二十二日郭松林楊鼎勳飭令黃中元高占彪折回海澄帶三營全隊從橫口渡河進紮長橋郭松林等自率各營由漳州城南木棉庵九龍嶺至長橋會齊二十三日督各營出四成隊至近漳浦之博孝嶺該處適有賊卡正當衝途守賊千餘施放鎗礮各營併力破之追至水磨嶺城北突出悍賊數千勢甚猖獗郭松林等據山列陣及其撲近排放洋鎗賊始奔退二十四日各營拔隊進紮博孝嶺之南坑尾坑前等處城賊大股出犯郭松林

所部由大路迎擊楊鼎勳所部由沿山小路抄擊逆眾翻下水磨  
嶺我軍夾擊斃賊甚多其眾始潰自相蹂躪狂奔入城城外賊營  
乘勝一律踏毀我軍於二十五日偪紮東西北三面二十六日雲  
霄援賊大至城逆亦開門出應郭松林等以四成隊守營以六成  
接仗布置方定賊已至前被鎗礮連環擊回薄暮乘其懈怠擊之  
賊始潰奔郭松林等知城賊勢孤且我軍米糧不繼不能久持是  
夜商派周河清高占彪王萬釗黃中元等掌號吶喊明攻城之西  
南易川剛李長樂宋德鴻郭文武等各帶輜梯暗攻東北朱興榮  
張遵道舒義志吳勝清等由城西山背繞過南門外通雲霄大路  
之土橋地方潛伏謝連陞王德峻曹仁美洪寶麟孫懷德等伏於  
南門外迤東溪南小路以斷其下海並派道員段喆等會同署漳  
浦縣知縣英峻署游擊陳洪凱帶領鄉團擒殺竄賊該逆被攻倉

皇無措遂由南門出竄經我軍追擊及中伏截殺者其數千人餘賊向雲霄遁去遂於四月二十七日丑刻克復漳浦縣城續據馳報雲霄廳賊亦於二十七日竄去其南靖踞賊先於二十二日經楚軍擊遁即可規復詔安等情前來臣查漳州既克賊勢震動漳浦雲霄各城本料其不能久踞惟接郭松林等來函士卒轉戰數百里旬日之間攻城奪卡未嘗少休頗形疲乏且山路崎嶇饋運隔絕至以紅芋充飢時有乏食之慮幸該提督等嚴飭將士猛攻速下不致久頓赴機尙爲神速近聞詔安已復敗賊由閩粵邊界竄入江西贛州界內雖尙未得確報郭松林楊鼎勳二軍前經奏請繞赴江西湖南邊境迎堵實於大局有裨但恐相距過遠糧餉難繼除飭江海關道丁日昌由關稅內酌籌解濟並催該提督等相機前進此次據請隨摺保奏出力各員飭歸漳州案內彙保

外所有蘇軍克復漳浦縣城各緣由理合恭摺由驛馳陳伏乞  
皇太后

皇上聖鑒訓示謹

奏

籌調洋鎗礮隊赴津兼籌製造片

同治四年五月十六日

再臣欽奉五月初七日

寄諭許彭潘祖蔭奏請飭江蘇巡撫解落地開花礮並揀請悉製造火器之員由輪船北上一摺著即查明戈登所練洋鎗各隊尙有若干酌量派撥迅卽由輪船赴津並將落地開花礮多爲籌備一併由輪船帶來其帶隊洋人應否酌派數員隨同內地將弁管帶如令其前來必須妥籌章程覈定餉項以免臨時藉口事後要挾等弊丁日昌能否令其北上如該員不能離滬卽另派妥員帶領熟諳製造火器之匠役數人趕緊前來一面籌畫調派一面奏聞等因欽此臣先奉五月初一日

寄諭飭派得力鎮將統帶勁旅北援當卽籌派常鎮道潘鼎新統領所部淮勇十營內有開花礮隊一營由滬航海赴津於五月初

九日馳

奏在案此次許彭壽等請飭解開花礮與臣所籌不謀而合並據  
崇厚奏請調派戈登舊隊仍可邀同外國人幫同統領等語查從  
前中國將弁於洋鎗開花礮未請施放不得不用洋弁管帶本屬  
一時權宜挾制要求既不能免牢籠駕馭亦未易言總須主兵者  
兵力自強方能操縱由我用彼而不爲彼所制苟在我稍有把握  
即不必假以重權江蘇之常勝軍原係外國人幫同統領波瀾疊  
出糜費滋多且與洋人交涉各事均受牽制嗣戈登去後所存洋  
鎗隊千人以余在傍袁九皋兩副將分帶而統於潘鼎新其接手  
之兵官哲貝只下以教練虛名俾約束各兵頭不准干預營事故  
兩年以來巴夏禮雖局外數數饒舌哲貝等尙恪守規條潘鼎新  
所部月有開花礮隊一營上年攻拔展舍湖州等處頗著成效復



遂漸添置礮具朝夕操練已臻純熟該營向募有洋人隨營教習  
由該道節制調換糧餉均有定章不致藉口要挾自毋庸另派管  
帶其余在榜所帶洋鎗隊五百餘人袁九皋所帶三百餘人連餘  
丁計共一千餘名卽係戈登營部駐紮青浦之鳳凰山巴夏禮以  
人數太少屢請增添臣力持不允亦以潘鼎新全軍分駐松江塘  
橋本有輪換教練之議今潘軍旣經北調該處僅存此營戈登巴  
夏禮原議以此專防上海若再抽調不足以饜服外人之望臣飛  
飭丁曰昌體察情形一面預籌募補一面妥商巴夏禮等如可將  
余在榜一營交潘鼎新統帶北去兵力較厚余在榜同該營弁勇  
已熟悉洋人鎗礮火箭用法亦毋須洋弁管帶前往致難鈴束惟  
此項弁勇因牽涉洋人向須按月發餉不能絲毫拖欠若調令出  
省遠助勢難由滬接濟臣前已將潘鼎新月餉請由直東分濟卽

邀

俞允各該省未知能否照辦若再加以洋人所練鎗隊一營正恐撥款難靠必致誤事應請

豫飭總理各國事務衙門會同戶部逐細籌畫知照遵辦此籌調戈登練存洋鎗礮隊之大略也丁日昌到滬年餘情形愈熟聲望日孚刻值軍四出援剿各路糧餉子藥轉運接濟根本多在滬上以及雇備潘鼎新赴津輪船籌補鳳凰山教練勇額購辦外洋軍火在在關繫緊要全賴丁日昌督率籌辦方無貽誤萬不能離滬北上其所設上海製造礮局向由該員經理潘鼎新此行約攜帶大小開花礮子一萬餘顆蘇滬各局存儲尙多仍可隨後運濟北路縱有大戰事足供施放臣嘗與洋弁討論火器稔知巨礮攻城劫營最利而用子最多至平原曠野行陣自隨止須十二磅及

九磅六磅長礮及田雞礮較爲輕靈又苦不能及遠以之驚亂賊騎虛張聲威自可制勝惟陸路轉運費力究不若水路之進退自如則用于亦必不能多臣仍飭潘鼎新到直東後察酌情形稟商崇厚等如應設局製造卽妥議章程再由臣飭商丁日昌酌派該局熟練之員帶領匠役器具由輪船赴津開局鑄造炸彈以資應用容俟籌商定議再行覆

奏此遵籌製造火器人員擬赴天津設局之大略也頃據丁日昌稟稱天津輪船雇價比前赴廈門較貴恩遠之間洋商居奇恐未能定雇多隻臣仍督催籌辦俟稍就緒卽於本月二十日由江路駛赴金陵除交卸撫篆接署督篆日期分別恭疏

題報潘鼎新起程有期再速馳奏外所有遵

旨籌派先行覆陳各緣由伏乞

奏  
聖鑒訓示謹附片具

爭獲白齊文片

同治四年五月十六日

再美國人白齊文前因管帶常勝軍不遵調遣並敢毆官劫餉經  
臣奏明奉

旨革去三品頂戴聽候查辦詎白齊文於革退後私自赴京求英  
美兩國公使冀得復用事既不成遂投蘇城髮逆購濟軍火搶奪  
輪船拒敵官軍嗣屢敗衄爲賊所棄戈登復代央求悔罪投誠免  
其深究又經美國公使及領事官議明押令回美永不准再來中  
國上年五月間聞其潛至甯波欲往金陵投賊當經總理各國事  
務衙門照覆美公使轉飭拏辦並由臣飭飭上海各國領事通行  
各地方營卡一併緝拏在案茲據署福建陸路提督郭松林咨稱  
該營教習洋人司端里向與白齊文熟識四月十九日在廈門海  
口瞥見白齊文與英國人克令在司古那船上詢悉白齊文欲往

漳州投賊知司端里在蘇軍營中央請相送許給謝儀洋銀四百元司端里僞爲應允白齊文等遂坐小船至漳州十餘里鎮門河下暫住司端里卽至廈門稅務司處報信適代理稅務司巴德合先已接得臺灣關防聞白齊文來廈投漳之信正派辦揭謨及扞手二名在外密巡遂同將白齊文克令鎖解郭松林營中委員訊據供認投賊不諱當派幹弁押赴廈門交興泉永道鄧廷枏等收禁咨請辦理並據總稅務司赫德申報前來又准閩浙督臣左宗棠咨稱該道業將白齊文等兩犯解送行轅已飭解交福州府嚴密押禁咨商提案嚴辦各等因臣查白齊文窮兇極惡姦甘心助賊情罪重大且以不准再來中國之人仍潛入內地蓄意從逆謀害中國按律久應誅殛前緣美領事西華強執和約由本國治罪之條嘵嘵置辯致稍顯戮此次由郭松林營中掣獲若當時

作爲對敵殺死可省葛藤該提督等因係洋人及稅務司公同盤獲無法消彌既經解閩訊辦恐未便卽予駢誅惟查同治二年七月間總理衙門照會美公使文內聲明自應訪拏正法或被官兵鎗礮毆斃均罪有應得等語嗣該逆復來中國該公使與領事均有拘拏嚴辦之說中國之待白齊文恩典寬恕已至再至三該犯惡貫滿盈在外國則不守法律亦非一次實爲中外人等切齒其憤不能容留之人應否由臣查覆左宗棠卽將白齊文正法餘犯解交該領事嚴辦抑俟

敕下總理衙門與美公使反覆申明情節詰以如何嚴辦或治以死罪使其不能置辯之處均候

旨飭遵臣未敢擅便至此次訪拏出力之外國各員弁等勤正可嘉代理廈門稅務司巴德合幫辦揭謨松字營教習司端里應請

旨均賞給三等寶星扞手羅士惠賈陸斯經應請

旨均賞給三等寶星由臣敬謹製辦分別給領以示鼓勵除咨總理衙門查核外所有爭獲白齊文擬請治罪緣由理合附片具陳伏乞

聖鑒訓示謹

奏



太倉鎮洋二屬改徵折色摺

同治四年五月十六日

奏爲蘇省太倉鎮洋二州縣地不產米請將漕糧改徵折色以紓民力恭摺奏祈

聖鑒事竊太倉州併所轄同城之鎮洋縣地居濱海在宋時本隸崑山常熟後分崑山東南沿海地爲嘉定明初又割崑山常熟嘉定三邑沿海邊地添設太倉州

國朝雍正三年升爲直隸州並闢東南鄉地方設附郭之鎮洋縣在建置之初輾轉分割原屬多瘠而少肥故種植之法遷就土宜祇能就棉而舍稻以產棉之區責以完米民情實多苦累今據太倉州知州方傳書鎮洋縣知縣李萼馨稟稱蘇松太官田浮糧基逢

恩旨准減三分之一凡在士民無不同聲感激惟太鎮浮糧之外

尙有買米完漕之累爲兩邑士民所獨苦者緣太鎮分建之始盡割他邑瘠薄之區積而成邑又因舊隸蘇州賦課之重約略相等迨水利失修劉河改口土田高亢既不產米廩市蕭條無從采買不得不借糴鄰邑之粟以充本邑之糧越境轉輸其勞自倍幾番折閱其費自多夫出所有以上供賦稅民所甘也責所無而強就輸將民所苦也地利遠不逮蘇松而田賦科則幾埒於蘇州民收租息倍遜於松郡固理之未得其順也土宜本無殊嘉定寶山而一則寬之使改折一則抑之使完米又情之未得其平也況太倉州城前爲逆匪負固之區自民團大舉逆更讐視諸鄉肆行焚掠現尙人煙寥落田地荒蕪雖經招集崇明海門農民設法開墾咸以地多瘠薄竭一歲之勤勞所入不敷辦供是以流亡之民望故鄉而裹足汗萊之田待墾復而難齊一經改折既無輸米之難自

有力田之利流亡集而荒野闢是固改折之有便於民者甚溥也查太鎮歲徵漕白正米現奉

恩減之後約計起運漕糧正米四萬五千餘石以新定百二十萬之額漕而內折四萬餘石上不見其損以積苦兩邑之民免糴四萬餘米下大受其益正米既經改折耗米亦併起徵是起運則京倉收此四萬五千餘石正米餘耗徒隨正開銷折漕則部庫收十二萬餘兩額銀餘耗可盡充

國用方今幸覩昇平徐復河運改徵折色計可裁汰糧船百餘號所節經費為數更多且向來太鎮漕糧民欠多於他邑歷屆豁免案內官墊民欠均有七八萬石可為明證雖屬州縣墊挪仍耗國家財賦他邑民欠專因賦重賦減而欠自無虞太鎮民欠不專係賦重恐賦減而欠猶難免與其強民以所難而仍多帶欠下權

通賦之條何如予民以甚便而一律全完上無不足之課是又改折之有益於

國者甚多也一轉移間百姓既易於輸將州縣亦易於徵課於國計民生兩有裨益惟查嘉寶折案係前明所定價僅七錢難於援辦現在兵燹之餘各處田地拋荒米多騰貴財外散銀價偶平實與無事之時情形迥別況年歲豐歉不齊米價長落不一固未便以目前之價值而定久遠之章程自應前後通籌酌中定價查道光二十七年王大臣戶部會議以

京師之現銀太少南中之浮收太多請將南酒改徵折色定爲每石一兩三錢近年江西湖北折漕徵銀一兩九錢除一兩三錢部價外餘作隨漕之款各在案今秉公酌商應請仿照江西湖北辦過成案酌量加增每漕米一石徵銀二兩以部定一兩三錢解歸

部庫其餘七錢作為隨漕等款一併批解司庫耗米亦一律折銀二兩不在正米二兩之內似此量為變通較之嘉寶折價連耗七錢固屬多寡懸殊即較江西湖北成案亦已有盈無絀似屬於國於民兩無偏抑至白糧為

天庾玉粒未便並請折徵應令仍輸本色照常起運所有白糧隨正應支耗米贈五行月同額徵兵卹自當核數隨徵本色其漕糧改折銀兩徵解自應明定期擬請於每年十一月間開徵次年二月全完解交司庫分別解部備有遲延仍照漕糧例議處以杜虧欠侵挪之弊理合稟懇察核

奏請並聲明漕糧應折數目俟減賦定案後再行查報等情由蘇州布政司劉邵督核議轉詳請

奏前來臣等伏查太倉鎮洋二州縣地居海濱素不產米其土宜

賦則均與毘連之邦定寶山無殊而一則改折一則徵米辦法實  
未平允自應因時度勢量爲變通茲擬將白糧正耗仍輸本色照  
常起運以顧京倉根本其漕糧正耗等米請援照江西湖北辦過  
折漕成案酌量議加每石折徵銀二兩以一兩三錢解歸部庫作  
爲正價以七錢解交藩庫以抵隨漕各款體察情形實係無損正  
課有益民生相應恭懇

天恩俯准將太倉鎮洋二州縣應徵漕糧正耗改徵折色解部以  
順民情而紓積困理合會同漕運總督臣吳棠合詞恭摺具

奏伏乞

皇太后

皇上聖鑒訓示謹

奏

蘇省地漕錢糧一體酌減摺

同治四年五月十六日

奏為續陳蘇松等屬酌減漕額情形仰懇

天恩將地漕錢糧一體酌減恭摺奏祈

聖鑒事竊臣等欽奉同治二年六月初三日

上諭前因潘祖蔭丁壽昌先後奏請酌減江浙等處漕額當交戶

部議奏嗣據曾國藩李鴻章奏請減蘇松太三屬漕額因特降諭

旨宣示令曾國藩李鴻章分別查明折衷議減茲據戶部奏稱常

鎮漕額雖較輕於蘇松似應一律量加體卹惟據曾國藩等所奏

減蘇松太三屬漕額聲明與舊額本輕毋庸議減之常鎮二府通

融核計每年起運交倉米一百萬石以內是蘇松太三屬實徵米

五十萬石按之原額止存十分之四以常鎮二府額徵米較之未

免不得其平請將蘇松太三屬漕糧統按原額減去三分之一常

鎮二屬照原額酌減十分之一各等語著曾國藩李鴻章按照戶部酌減分數將蘇松常鎮太等屬漕糧各按上中下賦則一體分別議減以昭平允並將各該州縣等田額若干酌減若干分晰開列奏聞請旨務令下卹民生而不至上虧國用方爲妥善等因欽此仰見

聖主湛恩汪濊均平齊一之至意臣等跪誦之下欽感實深遵卽轉飭蘇藩司劉邵膏會同蘇糧道設局查辦一面詳稽志乘博采輿情議者以爲蘇松漕額偏重減數尙須請益又以銀米相連錢糧必須並減又有謂錢漕各有偏重應通牽合辦於蘇松太則錢漕並減於常鎮則專減錢糧以期內外兼顧又有謂減法宜均平公漕不分輕重一律均沾又有謂各屬科則有上中下懸遠之分減法亦當有多寡與不減之別按則核減則浮糧方可盡祛議論



既屬紛紛折衷必求至當臣等督飭司道詳細籌商竊維  
天庾正供既奉

諭旨以三分減一十分減一爲斷請益之說未敢再事瀆陳其餘  
各說尙皆可備采擇惟於懷遵

諭旨之中有不能不稍示變通之勢而併減錢糧尤爲推廣  
皇仁最爲切要之圖謹爲我

聖主詳陳之伏查蘇省賦額概科平米初無所謂條銀也嗣以額  
糧過重產米不敷始於平米內改徵條折並有不科本色者是銀  
米本自同原又有隨漕經費名曰漕項此項銀兩專濟漕運亦與  
地丁一串並徵故直省偶遇偏災無不銀米並蠲以前蘇省歷年  
辦災每至秋成米數一定地丁之奏銷與漕項之考成俱照米數  
驗派民間完納錢糧亦必俟蠲緩定案方始踴躍輸將江蘇四府

一州每年額徵地漕正銀二百一十五萬零自道光癸巳大水以後無歲不歉無歲不緩數十年來舊額幾同虛設卽如道光辛丑以後咸豐庚申以前二十年中奏銷完數之多以咸豐戊午八年爲最然地丁僅完九十餘萬兩漕項亦不過三十萬兩餘皆災歉民欠在承平無事之時情形尙復如此今各屬漕額旣荷非常曠典額編地漕銀兩自應援案一體請卹溯查雍正三年乾隆三年兩次蒙

旨共減蘇松浮糧六十五萬兩計數已不爲少惜當日奉行者未能仰承

德意詳考成憲稽科則之輕重寓調劑之權衡乃按額驗算均勻攤派至不科本色之折糧分隸海門之沙地一律普減而本折並科最重各屬反無以資挹注輕者益輕重者仍重流極至今仍有

不得不減之勢臣等自接奉減漕

恩旨後早欲覆奏而吳中官紳無人不求再減錢糧初疑乞

恩太濫未敢上陳旣而通盤籌畫反復諮詢若減米而不減銀奏  
銷萬難如額必至捏災請緩仍蹈故轍際此瘡痍之後休養需時  
欲其解徵之數轉增於完善之年此事理必無者更慮經徵之員  
苟且彌縫此有所盈彼有所絀因銀不足而累及於米所關尤重  
與其久懸虛額使民間徒受追呼何若悉予蠲除俾徵數得歸實  
在且於三十年來捏報例災之弊政可以永革查蘇松常鎮太五  
屬地漕每畝實徵數目尙不至大有軒輊則議減成數自不必強  
爲區分擬請將該五府州地漕錢糧一體分別酌減其成數總以  
十分之二爲斷所謂推廣

皇仁者此也至各州縣漕糧賦額不同卽一州一縣上中下則亦

甚懸殊欲其銖兩悉稱一律均平誠非易易竊謂治病當治其原  
去弊務去其甚蘇省浮糧官田乃其原也嗣因解運賠累疊次加  
耗重乃滋甚而官田舊籍久併民田耗米編徵久歸正米欲求減  
法之得平惟在按田以稽則前明宣德年間巡撫周忱奏減蘇州  
浮糧詳明每畝自一斗至四斗者各減十分之二自四斗一升至  
石以上者各減十分之三正統元年令蘇松等處官田在民田  
起科四斗一升至二石以上者減作三斗二斗一升至四斗者減  
作二斗一斗一升至二斗者減作一斗既有一斗以上及一斗一  
升之文則一斗以下不減可知卽康熙年間江蘇藩司慕天顏奏  
減浮糧亦有一斗五升以下地蕩山塗等則不可議減之語是按  
則議減歷有成規特其米數均指平米而言平米之中有木有折  
以現在賦額者之每平米一石派徵折色自一錢有奇二錢有奇

甚至八錢有奇者又派徵本色自三斗有奇四斗有奇甚至九斗有奇者平米之實數相懸如此故現在辦減未便照平米之科則而當照每畝實徵之科則輕者不減以顧

國計而度支不致大絀重者多減以卹民生而積累可以盡除惟常鎮二府僅止丹徒一縣有科則較重之區其餘各區及此外各縣科則均輕又有萬難按則之勢查常鎮二府與蘇松太本有區別且係欽奉

特旨減免自應與蘇松太三屬分案辦理常鎮漕糧擬普減十分之一蘇松太若亦用一律普減之法則蘇常毗連之地南北不下百里同一田畝蘇屬之長洲每畝減餘尙一斗三升有奇常屬之金匱每畝減餘止六升輕重仍復懸絕既不能請益於三分減一之外似不得不酌劑於三分減一之中以示均平而統計總數仍

是三分減一庶幾兩無窒礙所謂稍示變通者此也據藩司糧道

會詳請

奏前來臣等折衷眾論推求一是往返兩商意見相同徧訪輿情亦皆悅服合無仰懇

皇上逾格天恩俯准將蘇松常鎮太五屬額徵地漕錢糧一體減免十分之二仍查明上中各則分別核減其有折糧田地不科木色及兼科木色而每畝科徵在三分以下者概不議減至蘇松太三屬漕糧亦按則分別遞減毋庸併減五升以下之輕則統照部議三分減一之數常鎮二屬漕糧則一律普減各照部議十分減一之數庶於培養元氣之中仍寓慎重度支之意除督飭司道悉心較核妥議章程月行具

奏外所有分別籌辦減賦大概情形謹會同漕運總督臣吳棠合

詞恭摺具

奏伏乞

皇太后

皇上聖鑒訓示再此案關係重大輾轉籌商不厭詳慎是以奏報  
稍稽合併陳明謹  
奏

裁革錢漕積弊片

同治四年五月十六日

再江蘇錢漕既重流弊滋深以致官民交敝現在欽奉

恩旨減額內之浮糧若額外之浮收不減仍無以崇政體而蘇民困查糧銀按戶啟徵數多項屑小民折錢完納向由各州縣於買銀一兩中隨計必不可少之傾鎔火工等費照章定價徵解稍有盈餘卽留爲地方辦公之需定價不能過昂其弊尙不甚重弊之最重者無逾於徵收漕米時出入叢雜幾難究詰在州縣一切費用取給於漕亦屬必不可已乃糧戶中之強且黠者執正數而抹雜款動卽勢力相抗甚至包完短交故意與官爲難州縣徵糧起運例限禁追既無暇逐一嚴辦兼之自顧考成遂不得不示以隱忍並於馴良之戶稍從浮溢挹彼注茲冀全大局從此大戶愈佔便宜小戶愈受虧折此賦之不均所由來也從前屢經言路條陳



並經前督撫臣查辦常昭兩縣均賦以糶漸次推廣復將漕糧河運幫費開單

奏請分別裁減旋即議改海運官民之困稍紓軍興以來錢漕停徵兩年同治二年秋間蘇漕司劉卹膏體察松江太倉兩屬情形尙有可以酌徵之處惟兵燹之餘尤應加意體卹凡地丁錢糧之以錢完納者酌定折價劃一徵收仍將向來各屬解司錢糧所需隨解傾鎔火工等款一律減半飭提通行遵照並移糧道將解道之漕項仿照辦理是年徵辦冬漕因起運之數無多飭令本折兼收聽從民便一面采訪市價併計漕務用款酌定折徵數目務使大小戶一律均平不在稍有軒輊所有漕務費用大加刪減明白曉諭各衙門官吏人等尙知遵守是以羨餘所入均僅勉強辦公不致重爲民累可期積弊漸除由該司先後詳報前來臣等復查

蘇省地方日就廓清小民元氣尙難驟復寬一分則受一分之益該司分別核減浮費酌定徵價並禁革大小戶名目辦理尙屬得宜是以同治三年冬漕亦卽循照舉辦並將漕糧本折兼收緣由按年奏

聞在案第係權宜救時之計既恐日久玩生且此時米貴銀賤不能遽爲定衡應俟減賦定案再行督飭司道通盤籌畫妥議經久章程務使官民相安輸將踴躍另行

奏明立案惟在官之浮收必須裁除而大戶之短交難遽盡革查大小戶不均之弊惟蘇松爲甚而蘇尤甚於松自臣蒞任後松江府屬已兩屆徵漕蘇屬尙未開徵年來辦理餉捐田捐各大戶不免多所趨避應請

明降諭旨嚴飭臣等嗣後遇有大戶包攬短交等弊無論職官及

舉貢生監一律執法相繩俾得知所儆惕而尤在各州縣勤求治  
理潔己奉公不致爲劣衿挾持短長庶漕務地方均有起色臣等  
爲慎重漕運起見謹會詞附片具陳伏乞

聖鑒訓示謹

奏

添調赴津之洋鎗隊無從撤回摺

同治四年閏五月初三日

奏為潘鼎新一軍由滬航海赴津起程並添調余在榜洋鎗隊一營業經登舟難再撤回恭摺奏報仰祈

聖鑒事竊臣於五月二十日由蘇起行途次專員將撫篆齎交護撫臣劉帥膏接收卽出江陰口坐捕盜局輪船星夜兼程於二十二日駛抵江南省城接署督篆當卽專疏

題報並由督臣曾國藩將交卸日期馳奏在案頃接常鎮道潘鼎新蘇松太道丁日昌稟稱先由丁日昌督同委員董事雇備輪船四隻夾板船五隻潘鼎新所部淮勇鼎字鎗礮隊十營及續調青浦鳳凰山余在榜洋鎗隊一營均於二十二二十三二十四等日陸續拔隊到滬連日搬運軍裝配搭船隻殊費周折二十六日已開駛輪船二隻其餘各船儘於二十七八日全數放洋初三三日

當抵天津各等因臣於二十六日接奉二十一日

寄諭蘇省洋鎗隊祇有千名僅敷留防本地之用卽著仍留青浦毋庸調赴直隸管帶洋鎗隊之余在榜袁九皋二員亦著毋庸再調等因欽此隨卽恭錄轉飭丁日昌等欽遵辦理惟查由金陵遞信至上海至速五日乃到茲據該道等稟報是二十六日欽奉諭旨之時已在各營拔隊登舟之後丁日昌接信更在各營開駛放洋之後本係遵

旨飭調無從撤回臣先已密屬丁日昌與英領事巴夏禮兵官哲貝等妥議如將余在榜鎗隊一營調往直隸卽照數另募一營派久經戰陣之候補知府趙宗道管帶仍駐鳳凰山交哲貝幫同教練由丁日昌節制調遣巴夏禮等初猶饒舌嗣經丁日昌反復開導並允於一月內募齊勇數所有余在榜營中攜去戈登原購之

○開花燄洋火箭洋鎗等件爲之一一購還巴酋始允又欲令洋弁  
隨往照料該道等慮事後要挾再三力阻該營現並無洋人隨往  
幸余在榜係潘鼎新舊部恩信素孚鎗礮精熟可期得力實無須  
再添洋人致受牽制又據潘鼎新稟稱該軍十營餉需業蒙奏請  
飭下直東督撫按月各撥銀一萬五千兩誠恐兩省分辦易致推  
諉孤軍遠役呼應難靈又添調余在榜一營因係洋人教練在滬  
未缺一日之餉到直後行營無定若待蘇滬接濟轉折太多勢必  
鞭長莫及若無可靠之款缺望易生終恐難得死力等語臣於五  
月初九日覆陳調派潘鼎新一摺五月十六日覆陳遵調洋鎗隊  
一片均已籌慮及此

朝廷但以兵力得用爲望臣等尤以餉項無著爲虞若無人管餉  
則雖有用之兵亦將變爲無用仍乞

聖明核酌示遵所有潛鼎新一軍由滬航海並添調余在榜洋鎗  
隊業經登舟各緣由理合專摺由驛馳陳伏乞

皇太后

皇上聖鑒訓示謹

奏

李文忠公奏稿卷八